

SAMÞYKKT

sveitarstjórnar Grýtubakkahrepps um útvistartíma barna og ungmenna í Grýtubakkahreppi.

1. gr.

Börn, 9 ára og yngri, mega ekki vera á almannafæri eftir klukkan 21.00 nema í fylgd með fullorðnum.

2. gr.

Börn, sem eru á aldrinum 10 til 12 ára, mega ekki vera á almannafæri eftir klukkan 22.00 nema í fylgd með fullorðnum enda séu þau ekki á heimferð frá viðurkenndri skóla-, íþrótta- eða æskulýðssamkomu.

3. gr.

Börn og ungmenni, sem eru á aldrinum 13 til 16 ára, mega ekki vera á almannafæri eftir klukkan 23.00 nema í fylgd með fullorðnum enda séu þau ekki á heimferð frá viðurkenndri skóla-, íþrótta- eða æskulýðssamkomu.

4. gr.

Á tímabilinu 1. maí til 1. september lengist útvistartími barna og ungmenna um eina klukkustund. Einnig lengist útvistartími barna og ungmenna um eina klukkustund á föstudags- og laugardagskvöldum á tímabilinu 1. september til 1. maí.

5. gr.

Öll aldursmörk samkvæmt samþykkt þessari miðast við fæðingarár.

Samþykkt þessi, sem sveitarstjórn Grýtubakkahrepps hefur sett skv. 57. gr. laga um vernd barna og ungmenna, nr. 58/1992, með síðari breytingum, staðfestist hér með til að öðlast gildi þegar í stað.

Félagsmálaráðuneytið, 12. október 1995.

Páll Pétursson.

Anna G. Björnsdóttir.

REGLUGERÐ

um þorskfisknet.

1. gr.

Heimilt er að stunda veiðar í þorskfisknet með þeim takmörkunum sem ákveðið er í lögum og reglugerðum hverju sinni.

Á eftirgreindum svæðum eru þorskfiskveiðar í net bannaðar allt árið:

- a) Í Faxaflóa innan línu, sem dregin er úr Þormóðsskeri í Gölt.
- b) Á Breiðafirði innan línu, sem dregin er úr Skorarvita (65°24'9 N - 23°57'2 V) um suðvesturhorn Selskers í Eyrarfjall við Grundarfjörð.

2. gr.

Lágmarksmöskvastærð þorskfiskneta, sem heimilt er að leggja, skal vera 6 þumlungar (152,4 mm).

Þrátt fyrir ákvæði 1. mgr. þessarar greinar er heimilt að leggja þorskfisknet með 5½ þumlunga riðli (139,7 mm) í Faxaflóa innan línu, sem dregin er milli Garðskagavita og Malarrifsvita.

3. gr.

Þegar möskvastærð er mæld skulu þrír möskvar lagðir saman og teygðir horna á milli eftir lengd netsins. Skal þá flöt mælistika, sem er jafnbreið leyfilegri lágmarksmöskvastærð, sbr. 2. gr. og 2 mm þykk, komast auðveldlega í gegnum möskvana. Netið skal mælt vott.

4. gr.

Allir netadrekar skulu greinilega merktir umdæmisnúmerum þeirra skipa, sem nota þá. Merki þessi skulu vera soðin á netadrekana.

Netabaujur skulu vera á báðum endum netatrossu og allar merktar með flaggi, sem komið er fyrir efst á baujustönginni. Á flaggið skal mála umdæmisnúmer þess skips, sem notar netin. Auk þessa er heimilt að auðkenna flaggið með kallmerki skipsins. Undir fyrrnefndu flaggi skal komið fyrir öðru flaggi, þar sem á er málað númer hvernar netatrossu þannig, að allar netatrossur skipsins séu tölusettar frá einum og til þess fjölda, sem skipið notar. Auk þessa skulu allir belgir merktir með umdæmisnúmerum þess skips, sem notar þá.

Merkingar á baujuflöggum og belgjum skulu vera greinilegar og skulu stafir stórir og skýrir.

Verði breytingar á umdæmisnúmerum skips, ber að breyta merkingum á veiðarfæra-útbúnaði í samræmi við þá breytingu.

Þegar netadrekar, netabaujur og belgir eru um borð í veiðiskipi, skulu þau vera merkt í samræmi við ákvæði þessarar greinar.

5. gr.

Netatrossur skulu merktar þannig, að glöggst megi greina, hvor endi netatrossu sé austur-eða vesturendi og er þá miðað við réttvísandi norður- og suðurlínu. Skal merking framkvæmd á þann hátt, að á miðju baujustangar á vestari enda trossu skal komið fyrir netahring (floti), sem hæglega má losa og færa milli bauja. Leggi skip net sín á svæði þar sem togveiðar eru heimilar, er skylt að auðkenna vestri enda netatrossa með hvítu blikkljósi.

6. gr.

Skipum, sem hafa 12 menn eða fleiri í áhöfn, er óheimilt að hafa fleiri en 150 net í sjó.

Séu í áhöfn 11 menn skulu ekki fleiri en 138 net í sjó.

Séu í áhöfn 10 menn skulu ekki fleiri en 126 net í sjó.

Séu í áhöfn 9 menn skulu ekki fleiri en 114 net í sjó.

Séu í áhöfn 8 menn skulu ekki fleiri en 102 net í sjó.

Séu í áhöfn 7 menn skulu ekki fleiri en 90 net í sjó.

Séu í áhöfn 6 menn skulu ekki fleiri en 78 net í sjó.

Séu í áhöfn 5 menn skulu ekki fleiri en 66 net í sjó.

Séu í áhöfn 4 menn skulu ekki fleiri en 54 net í sjó.

Séu í áhöfn 3 menn skulu ekki fleiri en 42 net í sjó.

Séu í áhöfn 2 menn skulu ekki fleiri en 30 net í sjó.

Sé sjálfvirkur netaafdráttarbúnaður (dráttarkarl) notaður við veiðarnar er heimilt að hafa 12 netum fleira í sjó en tilgreint er hér að ofan.

Miðað er við að 60 faðma löng slanga sé í hverju neti.

7. gr.

Þorskfisknet skulu lögð í eina stefnu á sama veiðisvæði, eftir því sem við verður komið.

8. gr.

Týni skip þorskfisknetum í sjó, ber skipstjóra að slæða þau upp. Takist það ekki skal hann tilkynna það Landhelgisgæslunni og skýra frá staðsetningu netanna, eins nákvæmlega og unnt er.

9. gr.

Auk eftirlits Landhelgisgæslu með veiðum og veiðarfærum hafa eftirlitsmenn Fiskistofu eftirlit með því, að ákvæðum reglugerðar þessarar sé fylgt og skal skipstjóri veiðiskips gera eftirlitsmönnum kleift að gera þær athuganir á veiðarfærum skipsins, er þeir telja nauðsynlegar.

10. gr.

Brot á ákvæðum reglugerðar þessarar varða viðurlögum samkvæmt ákvæðum laga nr. 81 31. maí 1976, um veiðar í fiskveiðilandhelgi Íslands. Með mál út af brotum skal farið að hætti opinberra mála.

11. gr.

Reglugerð þessi er sett samkvæmt ákvæðum laga nr. 81 31. maí 1976, um veiðar í fiskveiðilandhelgi Íslands til þess að öðlast gildi 1. nóvember 1995 og birtist til eftirbreytni öllum þeim, sem hlut eiga að máli. Jafnframt er felld úr gildi reglugerð nr. 346, 7. september 1992, um þorskfisknet, ásamt síðari breytingum.

Sjávarútvegsráðuneytið, 17. október 1995.

F. h. r.

Árni Kolbeinsson.

Jón B. Jónasson.

REGLUGERÐ

um hættumat í iðnaðarstarfsemi.

I. KAFLI.

Almenn ákvæði.

1. gr.

Markmið.

Markmið reglugerðar þessarar er að stuðla að öryggi á vinnustöðum og vernda almenn- og umhverfi gegn hættu af tiltekinni iðnaðarstarfsemi sem getur valdið stórslysum.

Markmiðum reglugerðarinnar skal ná með því að rekstraraðili starfsemi, þar sem hættuleg efni eru notuð eða kunna að vera notuð og þar sem slys mundi hafa alvarlegar afleiðingar fyrir menn og umhverfi, geri nauðsynlegar varúðarráðstafanir til að koma í veg fyrir slys og draga úr afleiðingum þeirra. Jafnframt með því að starfsmenn í iðnaði fái þjálfun og upplýsingar til að koma í veg fyrir stórslys og ná tókum á ástandi ef slys verður.

2. gr.

Gildissvið.

Reglugerð þessi gildir um iðnaðarstarfsemi/starfsstöð, sbr. og I. viðauka, svo og búnað og geymslustaði, þar sem efni sem tiltekin eru í II. viðauka eru geymd eða notuð við eðlilega starfsemi, eða kunna að myndast við röskun á eðlilegri starfsemi í starfsstöðinni.